

瓊

州

府

志

一

續修瓊州府志序

瓊郡風俗敦樸在粵東爲第一。前觀察 鳴庭土公記之其言至詳且悉無庸復贅余曩在京師尤聞瓊郡人文蔚起代有偉人心輒慕之未幾出守斯郡甫下車得覽名賢舊蹟與郡人士遊洵速所聞矣獨郡志歷七十年未修余甚惜焉自周官小史掌邦國之志外史掌四方之志由是郡皆有志通於古今志修而國史之採靡不由之矧我

國家承平二百年於茲休養生息在在鍾英毓秀瓊郡尤號才藪此七十年中事業之炳炳烺烺足備採擇者何限脫久而就湮後將奚述斯非郡守事歟顧念蒐羅人物意在激揚善類勸誠一方分其部署而運以機杼非具史家三長曷克勝任余不文且無公餘之暇蓋難其人矣謫鄉宦 翰山張方伯讀禮于家以是商之余余喜曰此誠鄉先生鄉先達之賢也夫爰以纂修事即托之方伯距今二載稿本告成而余旋奉

命分巡西徼有甘省之行勤事者請余數言以弁其首余維是舉也得方伯以總其成有諸紳士以集其益余將去而聿觀厥成固余心也抑余猶有望焉嘗見名區英傑挺生率鍾嶽

潛之靈其後之克自振拔得媲美於前者無論世族寒門而皆卓卓有可傳瓊郡前明
海忠介 邱文莊諸前輩固同以名臣彪炳史冊矣其他載在郡志並未及入志者亦皆
錚錚有聲如余所見張方伯卽其人矣郡之奇傑踵興信未艾也志成而撫舊觀新有激
勸之道倘生斯土與守斯郡者爭濯磨而求治理他日人才興而吏治盛又非徒風俗之
敦樸稱第一已也修志所係其鉅矣哉是爲序

賜進士出身

欽命甘肅安肅道現兼廣東雷瓊兵備道知瓊州府事長白明誼謹序

續修瓊州府志序

昔有明邱文莊公嘗以未修郡牒爲一恨意當時未屆應修且公蚤致通顯數十年列官臺閣無暇及此故耶嗣後王桐鄉先生曾經秉筆乃以建武復縣執舊疑史與衆論齟齬故未成書僅以瓊臺外紀名編又黃瞰江先生嘗應聘主修見于鄭篁溪先生所贈詩今皆不存迄讀唐西洲先生瓊臺志序有云志史事也而事必盡乎郡非徒例史以備事且欲仿史以寓義想其蒐討甚勤其紀載甚備其勸懲甚著且云體文莊而將順其欲爲之意尊桐鄉而忠輔其已成之書深歎前人著述矜慎不苟蓋如此夫以我瓊諸先達如數公者類皆蓄道德能文章又明代去古較近聞見較審其所撰著足以信於當時傳於後世惜乎藏書甚難不但宋元之瓊筦志萬州圖經不可復見卽桐鄉先生之外紀瞰江西洲二先生之撰有成書皆無一存者令人望古太息也

國朝最先修輯者有牛公天宿志次則賈公彙志最後有蕭公應植志牛志亦就殘闕然其文詞樸質猶見國初人筆意當時有明舊志想可得見然則今所傳牛賈二志必是本明

先達諸志而成後之人沿波討源更不能不鄭重而祖述焉者也岳崧學識淺闇又自幼壯遊學仕宦奔走四方於本郡典章人物未能討論精確仰止先賢自知無能爲役適道光己亥由楚北奉諱歸里郡之官及紳咸以續修爲言力辭不獲因與同郡夙好杜廣文以寬鄭孝廉乃憲文彩採輯遺佚大率以牛賈二志爲本輔以蕭志通志則黃泰泉志採錄尤多其金郝阮先後諸志及恭讀

大清一統志有切郡事者皆紀載焉計爲門類者十爲卷四十有四於舊事重加考訂疑者闕之新事間有續補皆據採訪所及詳加諮詢不敢斷以臆見雖挂漏訛誤固知不免匪敢云備事寓義信今傳後特以數十年間郡事聊備遺忘以爲後日修葺地蓋于前賢矜慎著述之意亦冀遞相祖述而不敢苟然從事也

道光辛丑仲秋旣望郡人張岳崧序

康熙十五年重修志序

郡守 牛天宿 山東進士

周禮小史掌邦國之志志者史之支派也分之爲郡邑之紀載合之卽

朝廷之宏謨恭遇

聖天子握圖御宇一統車書凡侯綏要荒靡不咸歸版籍而且柱史操觚芸香珥筆挾金簡瑤函之秘發石渠天祿之藏甚盛典也又何俟下及海濱九區徵其文獻哉雖然泰山以土壤成高江海以細流成深瓊於輿圖猶之土壤細流也烏可無所獻納以佐

聖世之高深也耶稽瓊之有志昉自漢唐下迄故明司徒唐公副憲戴公雖嘗修之迨萬曆丙辰以後五十餘年其間變故多端興衰不一如戶口有登耗賦役有增減天道有災祥人事有從違名宦鄉賢或湮沒而不著忠孝節義或沈淪而不傳皆當採訪確實蒐羅無漏勒諸簡編用垂不朽者也乃當日邈焉絕響豈案牘勞形而不暇及耶抑運會滄桑而維日不足耶不敏於己酉歲蒞任茲土即索舊志而披閱之見斷簡殘編多混亥豕而於五十餘年之故實復闕然無傳心切傷之爰馳簡牘諮諏同志而應者半違者半遂致大典

中格可勝惜哉茲逢

彤庭渙號允閣臣之請下採郡邑山川形勢戶口風俗以襄一代之鴻書又重以院司道之嚴
檄於是各屬司牧不得以簡僻荒邑爲卸責之地矣不數月而列土之舊志新乘靡集屬
至然不有郢削曷勝完璧用是謀諸紳衿詢之故老闡發幽隱綜核名實浹月而書告成
綱舉而目張條分而縷析上自天文下迄地理中及人事分爲十卷所云詞簡事明義嚴
紀備者允無愧焉於以上佐車書一統之盛下開萬年有道之長未必無小補也何四患
五難之足慮云

康熙四十五年重修志序

郡守 賈 棠
歲貢 重錄

郡縣之有志猶國之有史也史具一王之法政刑之典理亂之迹咸備載焉志紀一郡之事山川人物田賦兵農大而城署學校細而民俗土產罔弗志焉故志者將以示後而傳信徵往而詔來顧可弗重乎瓊處遐荒絕徼孤懸海外漢世雖隸職方旋從賈捐之之議棄而不有其視茲郡無異附贅懸疣加以重山深宵黎岐雜處居室飲食悉異於人曾語言之不可通而況徵以文獻乎雖然瓊境廣袤千里自唐宋以來瓊海而周設爲十三州呂邊海亭障棋置星羅明初改郡統之生齒日繁人文蔚起至號爲海濱鄒魯寧復與漢世同日語耶歲戊寅余自比部秩滿循例補外得粵瓊郡或謂浮海險遠瘴癘爲毒遷謫之所憂而筮仕之畏途也余獨念珠崖儋耳爲唐宋名賢萃止之區巨浸稽天扶桑浴日骨鯁理學之臣生焉矧山川民物政令文藝之盛可登可覽可歌可詠余竊慕之驅車而南曾不以瘴癘遠摠懷旣渡海即索郡志閱之欲以知全瓊勝概其如訛謬實甚匪特亥豕爲舛抑又根據多誤令人不可卒讀且計自壬子前守牛君修之迄戊寅幾三十載方

冊漸蠹老成凋謝遺事故實惟恐失之自戊寅迄今又逾八載日夜矢心思欲搜集二十餘年興革修舉之大端輯之補之以佐

聖朝大一統之盛業願自慚黯陋莫敢濫與於斯而亦不敢假手他人致來魏收北史之謂乙酉冬自羊城旋署值歲暮之暇取舊志校訂訛者更之謬者正之其或疑者闕焉至於一切新增務求其據事無據者不敢置一語之譽人無據者不敢加一字之褒余固寧嚴無濫而人之誠僞妍媸月且有評道路有口亦非余一人能爲之飾也舉其大綱次爲十卷疆域以志廣遠建置以志墾舉賦役紀土貢學校紀教育兵防所以保圉也秩官所以治民也人物彰地靈之秀海黎昭往事之鑒雜志以補未備藝文以敷華藻三十餘年瓊郡故實差足徵矣然余竊有懼焉江文通云修史之難無逾於志而余敢易之乎繁既病蕪簡復患畧過嚴則恐潛德之弗彰過濫又虞紀載之失實尤慮絀一漏百負疚遺譏郡人張君履吉蕭君元長輩皆能留心故實者時得諮訪焉然遺畧舛誤或不能免是役也非敢任也若云撫拾散佚考謬繩訛以備後之君子採擇則余之心也

乾隆三十九年續修志序

郡守 蕭應植懷寧拔貢

瓊居大海之南郡故有乘明以前多軼弗傳

國初一修於前守牛君再修於賈君今距乙酉賈君所修又六十餘年其間人事變遷政事益損日久年湮幾至靡可稽攷又况沐浴

聖朝聲教文治聿興海黎恬乂更有不可不續書大書者哉然而修乘者難言之矣非執已見以警議前人謬加刪削沒曩者經營區畫之苦心卽亥豕之訛莫爲之更易滲漏之多莫爲之補苴其近今搜羅又一任夫耳目而考核弗真筆墨則信手揮之以致評論弗當而失褒揚之道者悉志乘之所深忌也辛卯冬余守茲土慨然有修舉之思請之上游以爲可願地處窪下往牒多霉蝕嘗從籃輿風日中博訪瓊臺遺事并馳牘於荷中紫貝諸屬邑以求六十餘年之故實而父老罕能道者取材於通志郡志十三屬州邑志及鄉先輩著述理郡暇偕郡丞陳君酌古準今諮諏商榷釐爲十卷積日而成帙焉事從其實疑似者闕之文從其簡冗蔓者芟之卽舊志中剪裁補綴不敢稍抒臆見尤不欲漠然聽之而

謂舉筆者之在前之人也憶余昔輯志濟源得以遍覽太行王屋諸勝今復從海外論纂
是書南溟五指朗然在目備太史增軒之採宜


盛代無外之謨使遐方絕島媲美中州顧不偉歟

補刊瓊州府志板序

志乘爲文獻攸關凡山川城域學校井田宦績人才民風物產以及經政藝文忠孝節義靡不備載從政者固以古爲鑑而開卷有益也郡志重修歷有年所板存琮璫書院地氣溼潮鼠傷蟻齧太壞不完有由來矣戊子余由水部奉

命出守攝篆是邦下車後訪察民情講求治理翻閱郡志殘缺失次字畫漫漶心焉惜之久欲補刊未得其人與書也今春觀察朱公亮生敦聘四明郭君金峨孝廉主講席與言及之慨然任其事並訪獲舊家完本詳細核對闕者補之哀者易之八閩句而竣字都七萬二千有奇其棗梨剞劂諸資提撥蘇泉書院棚地租銀不足余爲捐廉郭君以序請余歎然曰興廢舉墜有司事也志中載良法善政心竊慕焉限於力未能畢舉耿耿余懷茲就原板補苴缺失何足言序然瓊郡人文日盛吏治日新必有興起而重修者聊俟將來底稿或不無小補歟其原板闕字姑仍舊貫以俟考訂焉可耳

光緒十六年歲在庚寅季秋月署瓊州府事廣東高州府知府吉林隆斌序



瓊州府志目錄

卷首

序

圖

表

卷之一 輿地志

歷代沿革

卷之二 輿地志

星野

氣候 清沙縣

卷之三 輿地志

疆域

風俗

卷之四 輿地志

山川

嚴洞井泉附

水利

卷之五 輿地志

物產

卷之六 建置志

城池 公署附

卷之七 建置志

學校

書院

卷之八 建置志

壇廟

卷之九 建置志

都市

橋渡

卷之十 建置志

倉儲

坊表

卷之十一 建置志

古蹟

墳墓

養濟

卷之十二 經政志

銓選

祿餉 錢法附

卷之十三 經政志

戶口

土田 籍田附

屯田

科則

賦役 土貢附

卷之十四 經政志

鹽法

權稅 釐除稅附

卷之十五 經政志

祀典

釋奠

卷之十六 經政志

學制

卷之十七 經政志

兵制

郵政

船政

卷之十八 海黎志

海防

風潮

卷之十九 海黎志

海寇

防海條議

卷之二十 海黎志

黎情

村崗

卷之二十一 海黎志

關隘

卷之二十二 海黎志

防黎

撫黎附

黎議